



DEPUTACIÓN PROVINCIAL
A CORUÑA

SERVIZO ACCIÓN SOCIAL, EDUCACIÓN, DEPORTES E MOCIDADE
SECCIÓN DE DEPORTES E MOCIDADE

Expediente: 025000044508

RESOLUCIÓN POLA QUE SE APROBAN AS BASES E A CONVOCATORIA DE ADHESIÓN AO XII CIRCUÍTO DE CARREIRAS DEPUTACIÓN DA CORUÑA

Don **VALENTIN GONZALEZ FORMOSO**, Presidente da Deputación Provincial da Coruña,

RESOLVO:

Primeiro.- Aprobar as bases da convocatoria de adhesión de concellos ao “XII Circuito de Carreiras Deputación da Coruña”, que estará integrado por carreiras populares que se van celebrar dende o 1 de abril ata o 31 de decembro de 2026 na provincia da Coruña.

A adhesión de concellos ao “XII Circuito de Carreiras Deputación da Coruña” desenvolverase segundo as seguintes

BASES REGULADORAS DA ADHESIÓN AO CIRCUÍTO DE CARREIRAS POPULARES DA DEPUTACIÓN DA CORUÑA PARA CONCELLOS DA PROVINCIA QUE SEXAN ENTIDADES ORGANIZADORAS.

“XII Circuito de Carreiras Deputación da Coruña” — Versión para Concellos Organizadores
A Deputación Provincial da Coruña convoca o “XII Circuito de Carreiras Deputación da Coruña”, integrado por carreiras populares de xestión directa ou indirecta dos concellos da provincia da Coruña que se celebren no ano 2026.

1. PARTICIPACIÓN DOS CONCELLOS

Poderán participar todos os concellos da provincia que organicen carreiras populares no ano 2026.

É imprescindible que as carreiras populares estean inscritas no calendario oficial da Federación Galega de Atletismo (FGA) e contén coas categorías reguladas seguintes

	CATEGORÍA	IDADE
MENORES	Sub 10	2017-2018
	Sub 12	2015-2016
	Sub 14	2013-2014
	Sub 16	2011-2012
	Sub 18	2009-2010

ABSOLUTA	Sub 20	2007-2008
	Sub 23	2004-2005-2006
	Sénior	2003-1991
	Master 1	1986-1991
	Master 2	1976-1985
	Master 3	1966-1975
	Master 4 e seguintes	1965 e anteriores

2. INSCRICIÓN DOS CONCELLOS

Logo da aprobación das presentes bases os concellos interesados en participar no “XII Circuito de Carreiras Deputación da Coruña”, presentarán a súa solicitude de participación no prazo de dez días a partir da publicación do anuncio da convocatoria e das bases no Boletín Oficial da Provincia.

Os concellos interesados só poderán presentar unha solicitude para unha única carreira popular, que terá que axustar o seu desenvolvemento ás bases aprobadas pola Deputación Provincial da Coruña.

De non ter a carreira inscrita no calendario oficial da Federación Gallega de Atletismo no momento de facer a solicitude de participación, os concellos seleccionados deberán inscribir a carreira no prazo dos 10 días naturais contados a partir da notificación da resolución da Presidencia que aproba a relación das carreiras que integrarán o “XII Circuito de Carreiras Deputación da Coruña”.

As solicitudes para participar no “XII Circuito de Carreiras Deputación da Coruña” presentaranse de xeito telemático, a través da plataforma de tramitación electrónica da Deputación (SUBTEL).

A tramitación telemática aplicaráselle a todas as fases do procedemento (solicitude e concesión) e incluíranse en cada unha delas as notificacións e as comunicacións, os requirimentos de información e documentación e máis os envíos de documentación que fosen necesarios para tramitar os expedientes.

3. CRITERIOS DE SELECCIÓN DAS CARREIRAS

As carreiras serán seleccionadas segundo os seguintes criterios:

1. Antigüidade no calendario da FGA (1 punto por ano de antigüidade, ata un máximo de 5 puntos).
2. Número de participantes en 2024 e 2025, polas seguintes grupos de idade:
 - Absoluta (de categoría sub20 a máster) 0,10 puntos por corredor/a.
 - Menores (de Sub 10 a Sub18) 0,15 puntos por corredor/a
3. Sostibilidade da carreira (10 puntos por carreira incluída no calendario nacional ou galego, nos anos 2024 e 2025).
4. Carreira con cronometraxe de chip (10 puntos por cada unha).
5. Carreira que conte cun número de edicións celebradas inferior a 10 (0,5 puntos por edición realizada).
6. Poderán terse en conta criterios de localización xeográfica e calendario de realización das carreiras, ata un máximo de 10 puntos.

A Deputación Provincial da Coruña, mediante resolución da Presidencia aprobará a relación das carreiras que integrarán o “XII Circuito de Carreiras Deputación da Coruña”.

Esta relación queda condicionada á inscrición de cada carreira como oficial no calendario da federación e á formalización en documento administrativo do contrato correspondente para a coordinación e control técnico do citado circuíto. De xeito que non formarán parte do “XII Circuíto de Carreiras Deputación da Coruña” circuíto, as que se celebren antes de formalizar o contrato de coordinación e control técnico en documento administrativo.

No caso de que unha das carreiras fose seleccionada, por resolución da presidencia, para participar no XII Circuíto, e na data da súa realización o contrato administrativo non se houbese formalizado en documento administrativo, terá que modificarse a data da carreira para continuar formando parte do Circuíto.

A selección das carreiras que integrarán o “XII Circuíto de Carreiras Deputación da Coruña” realizarase, logo da puntuación obtida en función da aplicación dos baremos establecidos para a selección das carreiras populares, do seguinte xeito:

- a) Carreiras por orde de puntuación obtida,
- b) Terán prioridade 5 carreiras daquelas que non formaran parte das dúas anteriores edicións deste circuíto por orde da puntuación obtida de entre as solicitudes presentadas con esta condición.

No caso de que todas as carreiras houbesen participado en edicións anteriores, seguirase a orde de maior puntuación para a selección das carreiras.

En caso de empate de puntos aplicaranse os criterios da selección seguindo a súa orde ata obter o desempate.

As coincidencias de carreiras na mesma data de desenvolvemento serán negociables, permitindo como máximo 2 carreiras coincidentes en data na mesma demarcación ou delegación da Federación Galega de Atletismo: A Coruña, Ferrol e Santiago sempre e cando non poida negociarse outra data de desenvolvemento.

4. BAIXAS, ALTAS E MODIFICACIÓNS DE DATA

A carreira popular que incumpra estas bases aprobadas pola Deputación provincial despois do informe da Federación Galega de Atletismo e a conformidade da Deputación Provincial da Coruña, causará baixa e será excluída do Circuíto de Carreiras Populares, mediante resolución da Presidencia.

Esta exclusión implica a inhabilitación do concello a participar durante dous anos no Circuíto de Carreiras Populares, caso de ser convocado pola Deputación provincial.

A Deputación Provincial da Coruña, despois de petición razoada e autorización da Federación Galega de Atletismo, poderá, mediante resolución da Presidencia, autorizar o cambio na data da celebración da carreira, integrante no presente circuíto. En ningún caso se autorizará cambio de data cando a petición se realice logo da data prevista inicialmente para a celebración da carreira (data que consta na resolución de Presidencia que designa as carreiras que integran o “XII Circuíto de Carreiras Populares Deputación da Coruña”).

De non celebrarse unha das carreiras, sen coñecemento previo da Deputación da Coruña, con antelación suficiente para integrar no Circuíto unha nova carreira, esta causará baixa e será excluída do circuíto provincial. Esta exclusión implica a inhabilitación da entidade solicitante para participar durante dous anos no circuíto provincial de carreiras populares, caso de ser convocado pola Deputación provincial.

De non poder celebrarse unha das carreiras, por causa de forza maior, a entidade solicitante terá ata 10 días (dende o día da causa de forza maior) para propoñer á FGA unha nova data que será

comunicada á Deputación para a súa aprobación. De non facelo neste prazo, causará baixa e quedará excluída do circuío. Esta exclusión implica a inhabilitación da entidade solicitante para participar durante dous anos no circuío provincial de carreiras populares, caso de ser convocado pola Deputación provincial. A inclusión dunha nova carreira, farase mediante resolución da Presidencia.

5. DESENVOLVEMENTO E NORMATIVA DAS COMPETICIÓNS

O “XII Circuíto de Carreiras Populares Deputación da Coruña”, estará controlado tecnicamente pola Federación Galega de Atletismo, a través das súas delegacións na Coruña, Santiago de Compostela e Ferrol, así como polo Departamento de Estatística da Federación Galega de Atletismo.

As carreiras que integran o circuío están suxeitas aos criterios mínimos obrigados que se establecen oficialmente para a organización de carreiras en ruta, aprobadas pola Xunta Directiva da Federación Galega de Atletismo e publicadas na circular número 68/2008.

Desenvolveranse seguindo as categorías indicadas nas bases do circuío para todas as categorías, desde as inferiores ata as veteranas.

Os concellos deben garantir:

- Cumprimento da normativa vixente (Real Decreto 1428/2003 e normativa autonómica).
- Peche ao tráfico e seguridade viaria.
- Vehículos de apoio, apertura e peche.
- Sinalización.
- Servizos sanitarios (médico e ambulancia).
- Persoal auxiliar.
- Seguro de responsabilidade civil.
- Seguro de accidentes deportivos para participantes.

Os regulamentos das carreiras populares deben adaptarse ás categorías oficiais indicadas no circuío.

Para os efectos de confeccionar a clasificación do circuío, a organización de cada carreira está obrigada a enviar no prazo de 5 días despois do remate da carreira os resultados de dita carreira en formato Excel ao seguinte enderezo de correo electrónico: competición@atletismo.gal, facendo constar o DNI de participante e número de licenza en caso de ser maior de idade; en caso de que o/a participante sexa menor de idade a Federación outorgará un número de participación que será mantido ao longo de todo o Circuíto.

Os devanditos resultados terán que ter os seguintes datos: nome, apelidos, data de nacemento, categoría, club, número de licenza e NIF.

Este incumprimento será motivo de exclusión da carreira do circuío provincial de carreiras populares.

A organización resérvase a potestade de cambiar os percorridos definidos, probas convocadas ou modificar o regulamento, circunstancias que serán comunicadas aos participantes co tempo suficiente.

A organización de cada proba, así como os premios ou agasallos que cada organizador considere axeitado contemplar na súa proba, son independentes da organización deste circuío, e serán proporcionados polos concellos como entidades organizadoras.

6. PUBLICIDADE OBRIGATORIA

Os concellos organizadores deberán incluír en todos os materiais de difusión de forma notoria:

- Logotipo da Deputación Provincial da Coruña
- Lenda: “XII Circuito de Carreiras Populares Deputación da Coruña”
- Lema: “O deporte fainos grandes”

Asemade deberá facilitar a colocación do arco de meta e demais elementos facilitados pola Deputación.

7. GASTOS FEDERATIVOS

A Deputación destina ata **700€ por carreira** como compensación polos gastos que obrigatoriamente cada concello ten que contratar coa Federación Galega de Atletismo para a participación no evento, en concreto:

- Canon da carreira
- Xuíces: desprazamento, axudas de custo, honorarios
- Tramitación de licenza de día (seguros) realizados polos inscritos só para a participación

A contía descontarase da liquidación emitida pola FGA á cada concello.

O importe dos gastos imputaranse á aplicación orzamentaria 0612/3411/22609, documento contable RC número de operación 220260001441, para facer fronte aos gastos derivados do convenio coa federación Galega de Atletismo por importe de 39.235,28 € (expediente relacionado 2026000000878).

8. COMITÉ ORGANIZADOR

O Comité Organizador estará integrado por:

Presidente/a: Persoa designada pola Deputación Provincial da Coruña.

Vicepresidente/a: Presidente da FGA ou persoa na que delegue.

Vogais: Un/ha representante da organización de cada unha das probas do circuito.

Un/ha representante das delegacións da FGA en Ferrol, Santiago de Compostela e A Coruña.

Un/ha representante dos concellos no que se desenvolverán as probas que compoñen o circuito.

A súa función principal será resolver aspectos organizativos para garantir o bo desenvolvemento de cada unha das probas.

Reunirse só en caso de necesidade e a súa función fundamental será resolver cuestións técnicas que se produzan nas distintas probas e que poidan afectar ao circuito (anomalías na participación, clasificacións, etc.)

O Comité do “XII Circuito de Carreiras Populares Deputación da Coruña”, actuará logo de denuncia presentada por escrito nos 3 días seguintes á carreira na que se cometeu a infracción, a través das canles proporcionadas pola Federación Galega de Atletismo. Examinada a denuncia polo Comité, trasladarase a dita denuncia á persoa interesada para que, nos 5 días seguintes, realice as alegacións oportunas. Transcorrido o prazo, con ou sen presentación de alegacións, o Comité resolverá o que proceda; sendo a súa decisión única e inapelable.

O Comité resérvase o dereito de actuar de oficio cando concorran causas excepcionais que así o aconsellen.

9. PUBLICACIÓN OFICIAL

A convocatoria e as bases reguladoras publicaranse no Boletín Oficial da Provincia.

Toda a información sobre o circuíto, as clasificacións parciais de cada unha das probas poderanse consultar nas seguintes páxinas web: www.atletismo.gal, e www.carreirasgalegas.com ou ben na páxina oficial da Deputación Provincial da Coruña www.dacoruna.gal.

De conformidade co establecido no artigo 40.2 da Lei 39/2015, do 1 de outubro, do Procedemento Administrativo Común das Administracións Públicas (LPACAP), infórmase de que a resolución anterior esgota a vía administrativa, de acordo co disposto no artigo 114.1.e) da LPACAP, polo que, en virtude do artigo 123 da referida norma, contra a presente resolución poderá interpoñer recurso potestativo de reposición ante o Presidente da Excelentísima Deputación Provincial da Coruña no prazo dun mes, contado a partires do día seguinte a aquel no que teña lugar a notificación, tal e como tamén preceptúa o artigo 52.1 da Lei 7/1985, do 2 de abril, Reguladora das Bases do Réxime Local. Neste caso non se poderá interpoñer recurso contencioso-administrativo ata que sexa resolto expresamente o recurso potestativo de reposición ou se produza a desestimación presunta do mesmo.

Así mesmo, a persoa interesada poderá interpoñer directamente contra a presente resolución recurso contencioso-administrativo, previsto na Lei 29/1998, do 13 de xullo, reguladora da Xurisdición contencioso-administrativa, no prazo de dous meses, contado a partires do día seguinte a aquel no que teña lugar a notificación, perante a Sección do Contencioso-Administrativo do Tribunal de Instancia que corresponda, de conformidade co disposto na devandita Lei e na disposición adicional primeira da Lei orgánica 1/2025, do 2 de xaneiro, de medidas en materia de eficiencia do Servizo público de Xustiza.

Todo isto, sen prexuízo de que se poida exercitar calquera outro recurso que se estime pertinente.